

25 MAY 2003

Mahathir-Renang

DR MAHATHIR CABAR GENERASI MUDA CIPTA REKOD DUNIA

LANGKAWI, 25 Mei (Bernama) -- Perdana Menteri Datuk Seri Dr Mahathir Mohamad hari ini mencabar generasi muda negara untuk mencipta rekod dunia.

Katanya setakat ini, rakyat Malaysia telahpun mencipta beberapa kejayaan bertaraf dunia termasuk mendaki Gunung Everest, belayar solo mengelilingi dunia dan terlibat dalam lumba lasak menggunakan kuda.

"Saya berharap pencapaian saudara Malik (perenang maraton, Abdul Malik Mydin, yang mengharungi Selat Melaka dari Kuala Perlis ke Langkawi) menjadi teladan kepada generasi muda, dan saya cabar generasi muda untuk meningkatkan pencapaian negara," katanya di majlis menyambut ketibaan perenang itu di Jeti Kuah, di sini.

Abdul Malik, yang berlepas dari Kuala Perlis pada 9.45 malam tadi, tiba di sini pada 11.48 pagi ini untuk mencatat masa 11 jam 3 minit bagi laluan sejauh 48km itu.

Ia merupakan sebahagian daripada persiapan beliau sebelum berenang merentasi Selat Inggeris pada Julai atau Ogos ini.

Dr Mahathir berkata Abdul Malik berlatih lebih tiga tahun dengan berenang hampir setiap hari termasuk di lautan sejuk.

"Alhamdulillah, hari ini kita dapat lihat hasilnya. Bukan mudah berenang 48km dari malam tadi dengan tidak tidur dan makan terhad, tapi dia bersemangat tinggi untuk meneruskan renangnya. Dia berenang dengan kadar 58 kuak dalam satu minit," katanya.

Malah, Malik dengan semangat dan kepercayaan yang tinggi telah menamatkan cabarannya empat jam lebih awal, kata Dr Mahathir, yang merupakan Penaung Cabaran Selat Inggeris 2003 yang akan disertai oleh Abdul Malik.

Perdana Menteri berkata walaupun Abdul Malik berenang dalam sangkar bagi mengelakkannya diserang obor-obor, "jangan sesiapa fikir dia pegang sangkar dan hanya ditarik. Saya sendiri lihat dia berenang bebas dalam sangkar."

Dr Mahathir, yang melepaskan Abdul Malik dari Kuala Perlis pukul 9.45 malam tadi, menaiki sebuah bot untuk meninjau Abdul Malik berenang.

Sambil mengucapkan tahniah kepada Abdul Malik, Perdana Menteri berharap kejayaannya itu menjadi teladan kepada rakyat terutamanya generasi muda.

"Kalau cari jalan mudah, jalan tidak diingini, kita akan binasa akhirnya," katanya.

Beliau juga mengucapkan terima kasih kepada jurulatih-jurulatih Abdul Malik dan penganjur cabaran kali ini.

Peringkat akhir renangan akhir Abdul Malik dan majlis sambutan untuk beliau di disini, disiarkan secara langsung oleh Radio dan Televisyen Malaysia (RTM).

Ketika diwawancara oleh RTM di majlis sambutan itu, Dr Mahathir berkata banyak lagi aktiviti mencabar yang boleh disertai oleh generasi muda untuk mencapai kejayaan bertaraf dunia jika mereka berminat dan tekun mencuba.

"Hanya bangsa yang berani menghadapi dan mengatasi cabaran akan menjadi bangsa yang berjaya," kata Perdana Menteri.

-- BERNAMA

MZM JM MAI